

西

巖

集

三



膳錄監生臣王人作

膳錄監生臣秦灃

欽定四庫全書

西巖集卷七

元 張之翰 撰

七言律

贈鄭東谷

乘興而來寓谷陽
雙瞳炯炯鬢蒼蒼
身隨野鶴情相熟
詩帶鱸魚句自香
世事到頭俱是夢
人生何處不為鄉
九山也似三山好
坐榻無氈儘不妨

閩學士子靜以詩見寄依韻奉答二首

閒身無物可遮羅
淡愛青山掃黛蛾
啼鳥喚人離憲府
好風吹句下鑾坡
一千八百盡烟景
二十四橋皆月波
天上文星是知己
老於淮海又如何

一任閒庭雀可羅
豈能求媚盡雙蛾
人情南海與北海
仕路上坡還下坡
自乏才華依日月
枉將狂直犯風波
世間讒口炎如火
奈此扁舟一葉何

與趙子昂學士相別於燕
今四寒暑一盃道舊
因餞以詩

江北江南會面難相逢問訊舊朝班人雖巧宦亦能歿
天若惜才方與閒金馬玉堂離別後白衣蒼狗笑談間
藕花時節尋君去先看吳興一帶山

壽趙方塘學士

掖垣花外識君初眉宇分明畫不如杜若秋鴻久相避
玉堂金馬忽同居斯文於世誰消長吾道如雲自卷舒
十五年來恩最厚不妨三上治安書

壽杜文玉先生

白頭高卧命安齋擬把功名付酒杯愛傳已成元凱癖
工詩深得少陵才天荒氷井春愁在月滿銅駝夜夢迴
政恐司天飛急奏少微光彩近三台

贈與屯僉事周卿

聞道揚鑣出帝京此心嘗到鄴南城共傳筆正如心正
獨愛詩聲似政聲六月隕霜冤已散五原飛雨獄初平
繡衣本忘埋輪後賴有當時慕蘭名

寄許御史獻臣時授福建僉事

綠鬢朱顏立要途先生老矣入閩初若論渠帥寧無命
比似諸君尚有除治世正須三尺法累人還是五車書
珠湖風月清如許何處茅廬不可居

送王朋益燕南僉事

一官初不待瓜期纔見青驄又繡衣北道人才公遴選
南臺綱紀要維持廣陵日暮羣烏合魯甸秋高獨鶴歸
過我西巖煩寄語明年收拾草堂賢

和姜中丞韻

抖擻三年薄宦塵更無一事可關身東鄰不若西隣祭
北阮何如南阮貧眼底江山千古在胸中風月四時新
自從勘破榮枯夢何處熙熙不是春

何中丞以東山憲使遂其請喜而作詩用餞行

色二首

宰相元來多守郡中丞何害復提刑風搖箕尾移卿月
雲破虛危現使星人道先聲動山嶽我知清望在朝廷
鵲華喜作迎公色說比當時百倍青

一道澄清人所難在公都付笑談間官辭要地寧非福
身寄監司便是閒公外有時臨北渚眼前無日不南山
山東父老應相語却恐徵車又趣還

雨中與方虛谷飲公有詩見示次其韻二首

南北東西萬里餘年來事事不如初詩窮但作平平看
政拙宜為下下書金馬玉堂非敢戀清香畫戟且叨居
十年再對吳山飲祇有詩仙未肯踈

雨脚垂垂尚未收三分春色二分休且携一斗新槽酒

來飲三間小市樓浮白可忘官裏事潮紅不勝鬢邊秋
人生適意方為樂何用虛名遍九州

次韻

過湖曾覓白雲龕題遍高峯北與南夢寐煙霞雖是澹
膏肓泉石却如貪袖中嘗有呼猿果坐上寧無抵鵲柑
長笑分司太清苦獨遊之外百無堪

送魏按察太初西還

君以奔祖
母喪到京

共愛文章有典型獨知忠孝是生平漏天南下幾千里

慟地西來四十程儘把范滂車上志都償令伯表中情
從今九折邛邽路看取前驅叱馭行

寄茅山許宗師二首

纔脫朝衣著法衣石壇星斗自光輝鶴曾有約從天下
雲本無心出岫飛洞裏仙人時共語山中騷客日相依
幾時道眼窺凡骨前世同游果是非

新自三峯頂上歸恨余不遇老宗師丹泉豈是人間酒
翠壁空題醉後詩孤月墮時猿叫早五雲深處鶴來遲

洞天若有游淮者手折寒梅寄一枝

茅山梁書記以二詩見寄依韻奉答

辦香勾曲謁東卿回首人間萬事輕
空翠旋添詩筆潤軟紅不染羽衣清
松風枕上游仙夢桂月巖中避俗情
咫尺三峯飛不去盃城又過臘嘉平

占斷仙家翰墨場仙家亦有沈東陽
詩含蒼朮湯中味書帶黃連餅裏香
萬里雲霞騎鶴客五湖煙雨釣魚郎
相期不得時相見恨殺南鴻獨自翔

梁以朮連
二物見送

寄李參政

當路諸公盡賞音，誰教拙宦到而今。
曾衝霄漢無多遠，忽墮泥塗有許深。
故國山川勞望眼，小園松竹負初心。
也知生世多磨折，不似年來未易禁。

和參政馬公韻

家具無多復此遷，壯懷亦不似當年。
扁舟直繫金山樹，醉筆曾題玉井蓮。
北闕一番新雨露，西巖千里舊風煙。
庾塵且莫輕相污，門有寒潭萬斛泉。

送崔參政還鄂省

政柄由來不易持
化絃更後可重揮
相門出相古亦有
賢路薦賢今最稀
鄂渚雲開山似畫
盧溝雪盡馬如飛
太平經濟非吾事
擬對東風賦式微

和寇冷泉總管見寄二首

生世多愁故少歡
每於平地起驚湍
分無一斗蒲桃酒
夢想三年首着盤
足自病來常倚杖
髮從短後不衝冠
此身僥倖催租了
便是雲間第一官

數千里外是吾州苟祿真成大繆悠仕逕近來難著脚
權門何處不低頭身辭北闕長為郡目極中原漫倚樓
自把行藏曾較計餘生豈止四宜休

代同恕送趙彥文總管

南山從此失崔嵬幾日賓筵許再陪事不留難真老手
民無愁嘆信良才思何畎畝應難想借冠朝廷倘許來
折盡銷魂橋畔柳奪侯東去忍人哉

送孫總管

借臨剝覺廟堂難劇郡須煩老手賢威惠能令有張趙
聲名從此失廊延杏紅槐綠絃歌地雨潤風柔稼穡天
濕盡秦民衣上淚可能明府不留鞭

送蘭總管之開成

郡守掄才自昔難漢家由此入天官青松雲壘千年秀
玉海霜澄五月寒禁止令行言易信入耕出戰力能寬
清風後日甘棠頌擬就崆峒石上看

代許有壬題朱舜咨總管德政詩卷